


TEZAU LITURGIC
25 NOIEMBRIE

SLUJBA
SF. MARI
MUCENIȚE
ECATERINA



MOSCOVA, 1765



**Мѣсяца Ноёмврія въ 24-й дѣнь
Служба святѣй великомученицѣ
Екатери́нѣ,
отправляемая по церковному
чиноположенію со всенощнымъ
бдѣніемъ**

НА МАЛѢЙ ВЕЧЕРНИ,

[**На Господи воззвахъ,**] **стихиры мученицѣ на
4, гласъ 4. Подобенъ: Яко дѣбля.**

Дѣвства добрѣтами,* и мученій
кровьми,* дѣшу твою украсивши, мученице
славная Екатери́но,* вручи́лася еси́
Созда́вшему,* сохраня́ющу тя нетлѣ́нну во вѣ́къ
исти́нно.* О се́мъ ликовствую́щи* съ во́инствы
арха́нгель и а́нгель,* апо́столь, проро́къ* и
мученикѣ ликостоя́ни, всехва́льная. **[Два́жды]**

И къ колѣсамъ привязáема,* и звѣрми
растерза́ема,* и огнѣмъ и водою
обостривши* тво́й помы́сль Божѣ́ственнымъ
Дѣ́хомъ,* тмы́ нача́льника течѣ́ни
крѣ́вными,* мужески удавила еси́,* и востекла́
еси́ къ разу́мнымъ черто́гомъ,* вѣ́но Жениху́
твоему́,* дѣво, принѣ́сши страда́ніе.

Жениха́ Христа́ Кро́вию* освятивши́ся, прехва́льная,* тво́єю кро́вию украси́ла еси́ плотску́ю оде́жду.* Тѣмже обо́уду просвѣ́щши́ся, прехва́льная, Екате́рино,* свѣ́тлаго сподо́билася еси́ черто́га Егѡ.* Егѡже моли́,* отъ тли́ и бѣ́дъ изба́виться,* вѣ́рою творя́щимъ* всечестну́ю па́мять твою́.

Сла́ва, гла́сь 6:

Одесну́ю Спа́са предста́ дѣ́ва, и страсотѣ́рпица и му́ченица, Екате́рино, одѣ́яна добродѣ́тельми непобѣ́ждѣна, и преукра́шена елѣ́емъ чистоты́, и кро́вию страда́нія, и вопію́щи къ Нему́, ра́достно свѣ́щу держа́щи: въ воню́ му́ра Твоегѡ́ теко́хъ, Христе́ Бо́же, яко уязви́хся Тво́єю любѡ́вию а́зь, не отлучи́ мене́, Женише́ небѣ́сный. То́я моли́твами, низпосли́ намъ, всеси́льне Спа́се, ми́лости Тво́я.

И ны́нѣ, пра́здника, гла́сь 2:

Двѣ́ри небѣ́сныя, воспри́имите Дѣ́ву Мари́ю, Неискусому́жну́ю, Чи́стую Богоро́дицу, изъ Нея́же чело́вѣкомъ изба́влѣніе.

Проки́мень дне́. И Сподо́би, Го́споди...

На стихѡ́внѣ́ стихи́ры, гла́сь 4. Подѡ́бенъ:

Яко добра́я.

Мучи́тельскому шата́нію* и на́глому суровству́,* по́мысломъ сопроти́вльши́ся мужему́дренно,* бу́дущихъ

предвѣдящи* наслажденіе,
богомудренная,* пребывающее присно во вѣки
неподвижимо,* еже и получила еси,* отъ земли
преставльшися къ чертогамъ небеснымъ,* и лику
неразоримому, славная.

Стихъ: Дивенъ Богъ во святыхъ
Своихъ,* Богъ Израилевъ.

Царствія благолѣпіе* и доброту красную
видѣти сподобилася еси,* Жениха твоего
Христа,* украшена ранами твердаго твоего
страданія,* и Источнику благихъ* достойно
приблизилася еси.* Отонудуже божественнаго
веселія плодъ* богато пріяла еси, блаженная,* и
безсмертную славу.

Стихъ: Въ церквахъ благословіте
Бога,* Господа отъ источниковъ Израилевыхъ.

Ни иго работное,* ни слабость женская,* ни
гладъ, ни раны запяша ти,* мученичествѣй
твердости уподобитися, всеславная,* усердіемъ
души муки претерпѣла еси.* Отонудуже
получила еси небесный чертогъ,* и вѣнцемъ
благодати украсилася еси,* предстоящи
Зиждителю твоему.

Слава, гласъ 5:

Дѣвства твоего красоты, восхотѣ Царь славы
Христось, яко непорочну тя невѣсту Себѣ
обручи, совокупленіемъ нетлѣннымъ, ибо волею

Своєю подавъ добрѣтъ твоей силу, на враги же и страсти непобѣдиму показá, претерпѣвшую раны горькія, и муки свирѣпыя, сугубымъ вѣнцемъ увязе́ ты, и постави одесную Себе́ яко царицу испещрену. Того́ моли, мученице честная и многострадальная, Екатери́но, пѣвцемъ твоимъ спасеніе и жизнь подати, и велию милость.

**И нынѣ, праздника, гласъ 2. Леонта
маистра:**

Днесъ въ храмъ приводится Всенепорочная Дѣва, во обителище Всецаря́ Бога и всея́ жизни нашея Питателя; днесъ Чистѣйшая Святы́ня, яко трилѣтствующая Юница, во святая́ святыхъ вводится; Той возопіимъ, яко ангель: раду́йся, Еди́на въ женахъ Благословенная.

По трисвятѣмъ тропарь мученицѣ, гласъ 4:

Агница Твоя́, Исусе, Екатери́на, зове́тъ велимъ гласомъ: Тебе́, Женише́ мой, люблю́, и Тебе́ ищущи, страдальчеству́ю, и сраспинаю́ся, и спогребая́юся крещенію Твоему́, и стражду́ Тебе́ ради, яко да царствую́ въ Тебѣ́, и умираю́ за Тя, да и живу́ съ Тобою; но, яко жертву непорочную, приими́ мя, съ любовію пожершую́ся Тебѣ́. Тоя́ молитвами, яко Милостивъ, спаси́ души́ наша.

Или сей, гласъ тойже:

Добродѣтельницами, яко лучами со́лнечными, просвѣтила еси́ неvēрныя мудрецы́. И, якоже пресвѣтлая луна́ ходящимъ въ но́щи, неvēрія тму́ отгна́ла еси́ и цари́цу увѣрила еси́, вкупѣ же и мучи́теля обли́чила еси́, богозванная неvēсто, блаже́нная Екатери́но, желаніемъ востекла́ еси́ въ небесный́ черто́гъ къ прекра́сному Жениху́, Христу́, и отъ Него́ ца́рскимъ вѣнцемъ вѣнчалася еси́: Ему́же, со а́нгелы предстоя́щи, за ны́ моли́ся, творя́щія пречестную́ па́мь твою́.

Слава, и нынѣ, праздника, гласъ тойже:

Дне́сь благоволе́нія Бо́жія предображе́ние и челове́ковъ спасе́нія проповѣда́ние въ хра́мъ Бо́жіи я́сно Дѣ́ва явля́ется и Христа́ всѣмъ предвозвеща́етъ. Той и мы велегласно возопи́мъ: ра́дуйся, смотре́нія Зижди́телева исполне́ние.

Ектенія ма́лая и отпу́сть.

НА ВЕЛИЦѢЙ ВЕЧЕРНИ,

Стихологису́емъ: Блаже́нъ му́жъ..., 1-й антифо́нь. На Го́споди воззва́хъ: поста́вимъ стихо́въ 8, и пое́мъ стихи́ры праздника 3 и святы́я 5.

Стихи́ры праздника, гласъ 1. Подо́бенъ: Небесныхъ чино́въ.

Приидіте, празднолюбцы всі,* пѣсньми почтїмъ* єдину Богородицу* Чїстую и Дѣву:* ввѣдїтся бо въ храмъ Божїй,* въ немъ жити нынѣ свѣтло,* святѣйшїй воистинну* Христовъ храмъ,* и радости всякія Ходатаица.

Двѣри, пророче, отвѣрзи,* вѣрою прїемли въ храмъ Господень приведенную,* всѣхъ ангелъ же и человекъ похвалу* и свѣтло радованіе,* внѣтърѣ жити и ликовати,* яже храмъ Божїй и обиталище.

Богородица Марїя, въ храмъ приведена,* хлѣбъ прїемлющи отъ ангела, явїся,* вопїюща Ей, радуїся.* зачнеши Сына неискусомужно,* Богоневѣстная благословенная Богородице Дѣво,* земнымъ благонаслѣдіе и назданіе.

Ины стихиры святыя, гласъ и подобенъ тойже.

Днесь красуется градъ Александрїя,* пленны твоя, мученице,* въ Божественнѣмъ храмѣ твоѣмъ имѣя премудро.* Тѣмже и мы благочестно празднуемъ,* Екатерїно, пѣмать твою честную:* молися о чтущихъ тя. **[Дважды]**

Екатерїны пѣмать нынѣ празднуимъ:* та бо истинно вся вражія силы* и словомъ же и дѣломъ низложи крѣпко* и риторское

противленіе.* Но молитвами ея избави ны,
Боже,* отъ безбожныхъ врагъ. **[Дважды]**

Радуйся, всеславная мученице Екатерино
честная:* Синайская бо гора,* въ нейже видѣ
купинѣ Моисей неопалиму,* въ той Христосъ
богоугодное тѣло твоё,* нынѣ преложивъ,
хранить* даже до времени втораго пришествія
Своего.

Слава, гласъ 2:

Радостно къ торжеству богомудрыя мученицы
Екатерины стецемся, о мучениколюбцы! И твою
похвалами, яко цвѣты, увяземъ, — радуйся, —
вопiously ей, — яже буесловныхъ риторовъ
свирѣпоустіе обличивши, яко ненаказанія
исполненныхъ, и тыя къ вѣрѣ Божественнѣй
руководствовавши; радуйся, яже тѣло
многоплетеннымъ мукамъ вдавши любве ради
Творца твоего, и не низложившия, яко
отроковица негиблема; радуйся, яже горняя
пребывалища, возмездіе болѣзней
наслѣдовавши, и славы вѣчныя наслаждаешися.
Еяже желающе, пѣснопѣвцы твои, надежды да
не отпадѣмъ.

И нынѣ, праздника, гласъ 8:

По рождествѣ Твоемъ, Богоневѣсто
Владычице, пришла еси въ храмъ Господень
воспитатися во святая святыхъ, яко освященна;

тогда́ и Гавріи́ль по́сланъ бы́сть къ Тебѣ́, Всенепоро́чнѣй, пи́щу Тебѣ́ прино́ся. Небе́сная вся уди́вишася, зря́ще Ду́ха Свята́го, въ Тя всѣ́льшася. Тѣ́мже, Пречи́стая и Нескве́рная, я́же на небеси́ и на земли́ сла́вима, Ма́ти Бо́жія, спаси́ ро́дь нашъ.

Аще суббота: И нынѣ, богородиченъ 1-й, настоящаго гласа.

Входъ. Прокименъ дне. И чтенія.

Пророчества Исаина чтеніе. [Глава 43.]

Та́ко глаго́летъ Госпо́дь: вси́ язы́цы собра́шася вку́пѣ, и со́берутся кня́зи отъ ни́хъ, кто́ возвѣ́ститъ сія́ въ ни́хъ? Или́ я́же отъ нача́ла, кто́ слы́шана сотвори́тъ ва́мъ? Да приведу́тъ свидѣ́тели своя́ и оправда́тся, и да услы́шатъ, и да реку́тъ и́стину. Буди́те Ми́ свидѣ́тели, и Азъ Свидѣ́тель, глаго́летъ Госпо́дь Бо́гъ, и отро́къ, его́же избра́хъ, да позна́ете и вѣ́руете Ми́, и разумѣ́ете, я́ко Азъ е́смь; пре́жде Мене́ не бы́сть инъ бо́гъ, и по Мнѣ́ не бу́детъ. Азъ е́смь Бо́гъ, и нѣ́сть развѣ́ Мене́ спаса́яй. Азъ возвѣ́стихъ и спаса́хъ, уничижи́хъ, и не бѣ́ въ ва́съ чу́ждій. Вы́ Мнѣ́ свидѣ́тели, и Азъ Госпо́дь Бо́гъ. И е́ще отъ нача́ла Азъ е́смь, и нѣ́сть отъ ру́къ Мои́хъ изба́вляяй; сотвори́ю, и кто́ отврати́тъ то? Си́це глаго́летъ Госпо́дь Бо́гъ, изба́вляяй ва́съ Святы́й Изра́илевъ.

Премудрости Соломоновы чтение. [Глава 3.]

Праведныхъ души въ руцѣ Божіей, и не прикоснется ихъ мука. Непщевани быша во очесѣхъ безумныхъ умрѣти, и вмѣнися озлобленіе исходъ ихъ, и еже отъ насъ шествіе сокрушеніе; они же суть въ мирѣ. Ибо предъ лицемъ человѣческимъ аще и муку приимуть, упованіе ихъ безсмертія исполнено. И вмалѣ наказани бывше, великими благодѣтельствовани будутъ, яко Богъ искуси я и обрѣте ихъ достойны Себѣ. Яко злато въ горнилѣ, искуси ихъ и, яко всеплодіе жертвенное, пріять я. И во время посѣщенія ихъ возсіяють и, яко искры по стѣблю, потекутъ: судятъ языкомъ и обладають людьми, и воцарится Господь въ нихъ во вѣки. Надѣющіися Нань разумѣють истину и вѣрніи въ любви пребудутъ Ему, яко благодать и милость въ преподобныхъ Его и посѣченіе во избранныхъ Его.

Премудрости Соломоновы чтение. [Глава 5.]

Праведницы во вѣки живутъ, и въ Господѣ мзда ихъ, и попеченіе ихъ у Вышняго. Сего ради приимуть царствіе благолѣпія и вѣнецъ доброты отъ руки Господни, зане десницею покрыетъ я и мышцею защититъ ихъ. Прииметъ всеоружіе — рвеніе свое и вооружитъ тварь въ мѣсть врагомъ. Облечетъся въ броня правды и

возложитъ шлемъ — судъ нелицемѣренъ. Прииметъ щитъ непобѣдимый — преподобіе, поостритъ же напрасный гнѣвъ — во оружіе, споборетъ же съ нимъ міръ на безумныя. Пойдутъ праволучныя стрѣлы молніины и, яко отъ благокругла лука облаковъ, на намѣреніе полетятъ, и отъ каменомѣтныя ярости исполнь падутъ грады. Вознегодуетъ на нихъ вода морская, рѣки же потопятъ я нагло. Сопротивъ станетъ имъ дѣхъ силы и, яко вихоръ, развѣетъ ихъ, и опустошитъ всю зѣмлю беззаконіе, и злодѣйство превратитъ престолы сильныхъ. Слышите убо, царіе, и разумѣйте, навѣкните, судіи концевъ земли. Внушите держащии множества и гордящися о народѣхъ языковъ, яко дана естъ отъ Господа держава вамъ и сила отъ Вышняго.

**На литіи стихіра прѣздника, гласъ 1.
Самогласная. Георгія Никомидійскаго.**

Да радуется днесь небо свѣше, и облацы веселіе да кропятъ о зѣло преславныхъ величіихъ Бога нашего: се бо Дверь, на востоки зрящая, рождшися отъ неплодове бесплодныя по обѣтованію и Богу освящена бывши въ жилище, днесь въ храмъ яко непорочное приношеніе приводится, да радуется Давидъ, бряца въ гусли: приведутся, рече, Царю дѣвы въ слѣдъ Ея, ближняя Ея приведутся внутрь скиніи Божія,

вну́тръ очи́сти́лица Егѡ́, воспи́татисѧ въ жи́лище
пре́жде вѣ́къ отъ Отца́ негнѣ́нно Ро́ждшагосѧ во
спасе́ніе ду́шъ на́шихъ.

**Ины стихи́ры мученицы, самогласны,
гласъ 3:**

Страда́льческое торжество́, вѣ́рніи,
богомудреннѣ́ соверша́емо, ви́дяще, чу́дному въ
совѣ́тѣхъ Бо́гу на́шему, благода́рственное
пѣснопѣ́ніе воспоймѣ́: невидимую бо держа́ву
проти́вныя си́лы, въ же́нствѣ́ естество́ побѣ́ди,
и Божѣ́ственную Свою́ си́лу въ не́мощи
соверши́въ, добромученицы; тоя́ моли́твами
спаса́етъ ду́ши на́ша.

Истины ча́шу отъ своихъ крове́й
страда́льческихъ всехва́льная мученица
Христо́ва, Екатери́но, раство́ривши и сію́ всегда́
предлага́ющи Цѣ́ркви, въ не́йже церко́вныя
питомцы́, му́дрости гласомъ созыва́етъ,
глаго́лющи: почерпите́ пи́во Воскресе́нія
свидѣ́тельное, невѣ́рныхъ прогоні́тельное, и
страсте́й чисті́тельное, благоче́стивымъ же
душа́мъ храні́тельно, Спа́су зову́ще: напои́вый
на́съ пото́комъ сла́дости Ду́ха, спаси́ ду́ши на́ша.

Иже Кро́вию Христо́вою ду́ши запеча́тавшѧ въ
де́нь изба́вленія, кро́вь святу́ю, отъ
мученическаго исто́чника востека́ющую на́мъ,
съ весе́ліемъ духо́внымъ проро́чески почерпе́мъ,

живото́чныхъ страсте́й Спа́совыхъ, и присносу́щныя сла́вы образо́вательну. Тѣмже Е́му возопі́емъ: прославля́йся во святы́хъ Твои́хъ, Го́споди, пресла́вныя Твоея́ страсотѣрпи́цы моли́твами, спаси́ ду́ши на́ша.

Сла́ва, гласъ 6:

Страда́льческимъ шѣствовавши путе́мъ, мучительскаго избѣжа́ла еси́ совѣта, **[и́мярекъ]**, всечестна́я: я́ко дѣва, у́бо мудра́, свѣшу́ нося́щи вошла́ еси́ во дво́ры Го́спода твоего́; я́ко мученица́ му́жествомъ, благода́ть пріяла еси́ исцѣлѣ́ити плотскія́ стра́сти. Но и на́съ, воспѣва́ющихъ тя, душе́вныхъ болѣ́зней изба́ви, я́же къ Бо́гу мо́льбами твои́ми.

И ны́нѣ, пра́здника, гласъ 5. Леон́та маи́стра.

Возсія́ де́нь радосте́нь и пра́здникъ всечесте́нь: дне́сь бо я́же пре́жде Рожде́ства и по Рожде́ствѣ́ Дѣ́ва пребы́вши, въ хра́мъ Го́сподень приво́дится, и раду́ется Заха́рїя ста́рецъ, роди́тель Предте́чевъ, и вопіе́тъ весело: прибли́жися, Предста́тельница скорбя́щихъ, въ хра́мъ святы́й, я́ко Свята́, освятѣ́тися во оби́телище Всеца́ря. Да веселѣ́тся Іоакі́мъ пра́отець, и Анна да раду́ется, я́ко принесо́ша Бо́гу я́ко трилѣ́тствующую Ю́ницу непоро́чную Влады́чицу. Ма́тери, сра́дуйтеся, дѣ́вы, взыгра́йте, и непло́ды, сликовству́йте, я́ко

отвѣрзе намъ небесное Царство пронареченная
Всецарица, радуйтесь, людие, и веселитесь.

На стиховнѣ стихиры, гласъ 4.

Подобенъ: Яко добля.

Мучительскому шатанію* и наглому
суровству,* помысломъ сопротивльшися
мужемудренно,* будущихъ
предвидящи* наслаждение,
богомудренная,* пребывающее присно во вѣки
неподвижимо,* еже и получила еси,* отъ земли
преставльшися къ чертогамъ небеснымъ,* и лику
неразоримому, славная.

**Стихъ: Дивенъ Богъ во святыхъ
Своихъ,* Богъ Израилевъ.**

Царствія благолѣпіе* и доброту красную
видѣти сподобилася еси,* Жениха твоего
Христа,* украшена ранами твердаго твоего
страданія,* и Источнику благихъ* достойно
приблизилася еси.* Отонудуже божественнаго
веселія плодъ* богато пріяла еси, блаженная,* и
безсмертную славу.

**Стихъ: Въ церквахъ благословите
Бога,* Господа отъ источникъ Израилевыхъ.**

Ни иго работное,* ни слабость женская,* ни
гладъ, ни раны запяша ти,* мученичествъ
твердости уподобитися, всеславная,* усердіемъ
души муки претерпѣла еси.* Отонудуже

получила еси небесный чертогъ,* и вѣнцемъ
благодати украсилася еси,* предстоящи
Зиждителю твоему.

Слава, гласъ 2:

Житіе невещественно навѣкши, судище
безбожное достигши, стала еси, побѣдоносице
Екатерино честная, цвѣтоносящи Божію
свѣтлость, и, Божественною мѣщю одѣяна,
повелѣнію мучителю поругалася еси и
риторовъ утолила еси буесловныя рѣчи,
многострадальная.

И нынѣ, праздника, гласъ 8:

Давидъ провозглашаше Тебѣ, Пречистая,
провидя освященіе входа Твоего въ храмъ, въ
немже концы, днесъ празднующе, славословятъ
Тя, Всепѣтая: яже бо прежде Рождества Дѣва и
по Рождествѣ пребывши нетлѣнна, Мати Слова
Жизни. Днесъ въ храмъ Захарія веселится,
восприемъ Тя, Владычице, и святая святыхъ
радуются, подъемши Тя, источника жизни
нашей. Тѣмже и мы псаломски вопіемъ Ти: о
насъ моли Сына Твоего и Бога нашего даровати
намъ велию милость.

**На благословеніи хлѣбовъ: Тропарь
великомученицы, гласъ 4: Добродѣтельми, яко
лучами.., дважды. И праздника, гласъ тойже:
Днесъ благоволенія**

Бо́жія.., **единожды.** [Пи́саны на ма́лѣй
вечѣрни.]

НА УТРЕНИ,
На Бо́гъ Господь: Тропа́рь пра́здника, два́жды.
Сла́ва, свѣтыя. И ны́нѣ, пра́здника.
По 1-й каѳісмѣ съда́ленъ, гла́съ 5.
Подобѣнь: Собезнача́льное.

Благоче́стно порабо́тившия Вседержи́телю,
злочести́вому же мучи́телю не порабо́тилася еси́,
честна́я, но претерпѣ́ла еси́ тве́рдо те́мное
заключе́ніе, и ра́нь разжже́ніе, и преста́вилася
еси́ къ Бо́гу, богому́драя мучени́це, Екате́рино,
моли́ся о на́съ, соверша́ющихъ па́мять
твою́. **[Два́жды.]**

Сла́ва, и ны́нѣ, пра́здника, гла́съ 1.
Подобѣнь: Ка́мени запеча́тану.

Восхва́лите, дѣ́вы, ма́тери, пра́зднуйте, лю́діе,
славосло́вите, свѣще́нницы, благосло́вите
Пречи́стую Ма́терь Бо́жію: плоти́ю бо
младѣ́нствующи, пре́жде во хра́мъ принесе́ся,
я́ко хра́мъ Бо́жій свѣтѣ́йшій. Тѣ́мже пра́здникъ
духо́вный соверша́юще, воспои́мъ Ю, я́ко
Предста́тельницу ро́да чело́вческаго.

По 2-й каѳісмѣ съда́ленъ, гла́съ 1.
Подобѣнь: Гро́бъ Тво́й.

Муче́ній о́гнь, Ду́ха росо́ю погаси́ла еси́,
че́стная, и къ́ Свѣ́ту преста́вилася еси́
боже́ственному и не́веще́ственному, и по
кончи́нѣ блаже́ннѣй исто́чаеши исцѣ́леній ка́пли,
Екатери́но, уста́вляющи разжже́ние страсте́й
си́лою духо́вною. **[Два́жды.]**

Сла́ва, и ны́нѣ, пра́здника, гла́сь то́йже.

Подобе́нь: Ка́мени запеча́тану.

Свята́я святы́хъ Богоро́дице су́щи, досто́йно
приведе́ся жи́ти во свята́я, я́ко одушевле́нь
Госпо́день киво́тъ и Свята́го Ду́ха и́стинно
вмѣсти́лице Боже́ственное, Дѣ́во Ма́ти: тѣмже
всели́ся въ Тя́, Иже Отцу́ Единоро́дный и
Свято́му Ду́ху соесте́ственный, Тво́й Сы́нъ
неискусому́жно, обоготвори́въ все́ челове́чество.

Та́же по́ліелѣй, и по по́ліелѣи припѣ́въ:

Велича́емъ тя́, страстоте́рпице Христо́ва
Екатери́но, и чте́мъ че́стное страда́ние тво́е, е́же
за Христа́ претерпѣ́ла еси́.

Псаломъ избра́нный: Бо́гъ на́мъ при́бѣжище
и си́ла, Помо́щникъ въ ско́рбехъ, обрѣ́тшихъ ны́
зѣло...

По по́ліелѣи, сѣ́даленъ, гла́сь 4.

Подобе́нь: Вознесѣ́йся на Кре́сть.

Прише́дшую Христу́ во́лею, и украси́вшую
добродѣ́тельми се́рдце, благолѣ́пно воспой́мъ,

Екатери́но, вѣрныхъ мно́жество: та́ бо посрами́ мучи́тельскую дерзость, и просія́вши яко солнце́ посреде́ беззако́нникъ, по кончи́нѣ яви́ся земнымъ подтвержде́ние божѣ́ственное, вку́пѣ и держа́ва. **[Два́жды.]**

Сла́ва, и ны́нѣ, пра́здника, гла́сь 8.

Подобѣнь: Повелѣ́нное та́йно.

Да ра́дуется Дави́дъ пѣснопи́сець, и да ликовству́етъ Иоакимъ со Анною, яко пло́дь святы́й изъ нихъ произы́де, Мари́я свѣтоно́сная, Божѣ́ственная свѣ́ща, и ра́дуется, входя́щи въ хра́мъ, Ю́же и, зря́, благослови́ Варахи́инъ сынъ и, ра́дуясь, взыва́ше: ра́дуйся, Чудо́ всеми́рное.

Степе́нна, 1-й антифо́нь 4-го гла́са.

Прокимѣнь, гла́сь 4: Дивѣнь Бо́гъ во святы́хъ Свои́хъ,* Бо́гъ Изра́илевъ. **Стихъ:** Въ це́рквахъ благослови́те Бо́га, Го́спода отъ исто́чникъ Изра́илевыхъ. **Всякое дыха́ние... Евангеліе отъ Ма́рка, зача́ло 21:** Во вре́мя о́но, по Иису́сѣ идяху наро́ди мно́зи... **Сла́ва:** Моли́твами святы́я великомученицы Екатери́ны... **И ны́нѣ:** Моли́твами Богоро́дицы... **Та́же:** Помилуй мя, Бо́же...

Посѣмъ стихи́ра, гла́сь 2:

Ра́достно къ торже́ству богому́дрия мученицы Екатери́ны стеце́мся, о мучениколю́бцы! И ту́ю похва́лами, яко цвѣ́ты, увязе́мъ, — ра́дуйся, —

вопію́ще ей, — я́же буесло́вныхъ ри́торовъ свирѣпоу́стіе обличивши, яко ненаказанія исполненныхъ, и ты́я къ вѣрѣ́ Божѣственнѣ́й руковѣдствовавши; ра́дуйся, я́же тѣ́ло многоплетѣ́ннымъ му́камъ вда́вши любве́ ра́ди Творца́ твоего́, и не низложивши́ся, яко отрокови́ца неги́блема; ра́дуйся, я́же го́рняя пребыва́лища, возме́здіе болѣ́зней наслѣ́довавши, и сла́вы вѣ́чныя наслажда́еши́ся. Ея́же жела́юще, пѣснопѣ́вцы тво́и, наде́жды да не отпаде́мъ.

**Кано́нъ пра́здника, со ирмосо́мъ на 6, и
святы́я на 8.**

**Кано́нъ пра́здника, гла́сь 4.
Пѣ́снь 1.**

Ирмо́сь: *Отве́рзу уста́ моя́, и напо́лнятся Ду́ха, и сло́во отры́гну Цари́цъ Ма́тери, и явлю́ся, свѣ́тло торже́ству́я, и воспою́, ра́дуюся, То́я вхожде́ніе.*

Премудро́сти, Пречи́стая, Ты сокрови́ще вѣ́мы и благода́ти, точа́щую исто́чникъ приснотеку́щій ра́зума, про́симъ: Тво́я ка́пли одожди́, Влады́чице, е́же воспѣ́вати Ты́ присно.

Превы́шши, Пречи́стая, небесе́ь бы́вши, хра́мъ и пала́та, въ хра́мъ Бо́жій возложи́лася еси́ То́му угото́ватися въ Бо́жественное жи́лище прише́ствія Е́го.

Свѣтъ возсіявши Богородица благодати, вся просвѣти и совокупи пресвѣтлое Ея украсити торжество пѣснями: приидите, къ Ней стецемся.

Дверь славная, помыслы непроходимая, двери отворши храма Божія, нынѣ повелѣваетъ намъ, совшедшимъ, Божественныхъ Ея чудесъ насладитися.

Инъ канонъ мученицы, егѣже краегранесіе:

Екатери́ну приснопамятную пѣснями пою. **Феофаново, гласъ 8.**

Пѣснь 1.

Ирмосъ: *Колесницегонителя фараона погрузи чудотвори иногда Моисейскій жезлъ, крестообразно поразивъ и раздѣливъ море, Израиля же бѣглеца, пѣшеходца спасе, пѣснь Богови воспѣвающа.*

Екатерины, всемудрыя мученицы, молитвами, Христе, мрачное око души моея просвѣти, зарю ми дая, Владыко, Твоего свѣтолитія, душетлѣнныхъ паденій моихъ весь мракъ потребляющую.

Направляема Владыки, всемудрая, Божественными повелѣніи и Того любовію палима, потекла еси, къ подвигомъ тщащися, и мучителей разумы, Екатерино, устрашила еси словомъ, и мудростію, и благодатію.

Управляема дланію, сла́вная, крѣпкою Христо́вою, ідо́льскія бу́ри избѣ́гла еси́, мученице, немо́кренно преплы́вши креста́ вѣтриломъ и Божѣ́ственными вѣтры Ду́ха, пѣ́снь Бо́гу воспѣ́вающи.

Радую́щися дѣ́вственными добро́тами, Екатери́но му́драя, и Божѣ́ственное зна́ніе съ небесе́ иму́щи, лжеимѣ́ннаго зна́нія благодерзнове́нно и му́жественно предста́тели посрами́ла еси́, ты́я держа́внѣ побѣ́дивши.

Богородиче́нь: **И**же Богоро́дицу Тя́ проповѣ́даетъ, Пречи́стая, всякія е́реси отрино́вѣніе има́тъ: пло́ть бо бы́вша, неизме́нно роди́ла еси́ превы́шша всякія, Богороди́тельнице, тва́ри Сло́во Бо́жіе Присносу́щное.

Катава́сія: *Христо́въ ражда́ется — сла́вите! Христо́въ съ небесе́ — сря́щите! Христо́въ на земли́ — возно́ситеся! По́йте Го́сподеви, вся́ земля, и весе́ліемъ воспойте, лю́діе, я́ко просла́вися.*

Пѣ́снь 3.

Ирмо́сь: *Твоя́ пѣ́сносло́вцы, Богоро́дице, живы́й и незави́стный Исто́чнице, ликъ себѣ́ совоку́пльшія, духо́вно утверди́, въ честномъ вхожде́ніи Твоёмъ вѣ́нцевъ сла́вы сподо́би.*

Невѣстокраситель днесь явися красный Дѣвы храмъ и чертогъ, пріемъ одушевленный чертогъ Божій, Чистую, и Непорочную, и Свѣтлѣйшую всея твари.

Давидъ, предначиная ликованіе, играетъ, и ликовствуетъ съ нами, и Царицу зовѣтъ Тя украшену, Пречистая, предстоящу, Всечистая, въ храмъ Царю и Богу.

Изь неяже преступленіе произыде дрѣвле роду человѣческому, изъ Тоя исправленіе и нетлѣніе процвѣте: Богородица днесь приводима въ домъ Божій.

Играютъ ангельская воинства и всѣхъ человѣкъ множество, и предъ лицемъ, Пречистая, предтекутъ Твоимъ днесь свѣщеносицы, зовуще величествія Твоя въ дому Божіи.

Инъ.

Ирмосъ: Утвержеи въ началъ небеса разумомъ и зѣмлю на водахъ основавый, на камени мя, Христе, заповѣдей Твоихъ утверди, яко нѣсть святъ, паче Тебе, единое Человѣколюбче.

Вольными твоими стремлѣньми вошла еси ко страданію, волею Христа подражаючи и побѣдивши свѣтло тмы міродержца,

вѣнценосица явилася еси, Екатерино
богоприятная.

Крѣпостію ума обличила еси мучители,
безбожія въ глубинѣ валяющіяся, риторствующи
явѣ богознанія догматы, Божіею мудростію
мученица уясняема всехвальная.

Равнобожіе во уши Евинѣ пошептавый, отъ
отроковицы младыя нынѣ попирается, оружіемъ
бо Креста оградившись, посрами Екатерина
мученица безмѣрно того хвалящаяся.

Богородичень: Умерщвленнѣй мой умъ
жизни дѣйствомъ изъ Тебѣ явльшися міру
воздвигни, язвы и струпы истребляющи
грѣховныя, единая Богородительнице
Всенепорочная.

Катавасія: Прѣжде вѣкъ отъ Отца
рожденному нетлѣнно Сыну и въ послѣдняя отъ
Дѣвы воплощенному безсѣменно, Христу Богу
возопіимъ: вознесый рогъ нашъ, Святъ еси,
Господи.

Кондакъ праздника, гласъ 4. Подобенъ:
Вознесыйся.

Пречистый храмъ Спасовъ, многоцѣнный
чертогъ и Дѣва, священное сокровище славы
Божія, днесь вводится въ домъ Господень,
благодать совводящи, Яже въ Дусѣ

Боже́ственномъ, Юже воспѣвають а́нгели Бо́жии: Сія́ е́сть селе́ніе небесное.

Икосъ:

Неизреченныхъ Бо́жихъ и Боже́ственныхъ та́инъ зря́ въ Дѣвѣ́ благода́ть явля́емую и исполня́емую я́вственно, раду́юся и о́бразъ разумѣ́ти недоумѣ́юся, стра́нный и неизреченный: ка́ко избра́нная, Чи́стая, едина́ явися́ па́че всея́ тва́ри ви́димыя и разумѣ́аемыя? Тѣмже восхва́лити хотя́ Сію́, ужа́саюся зѣло́ умо́мъ же и сло́вомъ, о́баче дерза́я, проповѣ́даю и велича́ю: Сія́ е́сть селе́ніе небесное.

Сѣдалень святыя, гласъ и подобень тойже:

Жениха́ твоего́, Христа́, возлюбивши, свѣщю́ твою́ свѣ́тло угото́вльши, добродѣ́тельми просія́вши, сла́вная. Тѣмже вошла́ еси́ съ Ни́мъ въ черто́гъ и, вѣне́ць страда́нія отъ Него́ пріе́мши, отъ бѣ́ды изба́ви насъ, соверша́ющихъ, Ека́тери́но, па́мьять твою́. **[Два́жды.]**

Слава, и нынѣ, праздника, гласъ тойже:

Дави́де, предъиди́ въ хра́мъ Бо́жій, и, раду́ясь, пріими́ Цари́цу на́шу, и То́й возопій: вни́ди, Госпоже́, въ хра́мъ Царе́въ, вни́ди, Ея́же сла́ва покрове́нно разумѣ́ется, изъ Нея́же хо́щеть источи́тися намъ всѣ́мъ Свѣ́тъ, Христосъ.

ПѢСНЬ 4.

Ирмосъ: *Неизслѣдный Божій совѣтъ, еже отъ Дѣвы воплощенія Тебѣ, Вышняго, пророкъ Аввакумъ, усмотряя, зовяше: слава силъ Твоей, Господи.*

Дверь непроходную Божій домъ приѣмля днесь, престати сотвори всякой службѣ законной, яко истинно явися, зовый, сущимъ на земли Истина.

Гора присѣнная, юже провидѣ древле Аввакумъ, предпроповѣда внутрь вмѣстившуюся въ неходныхъ храма, добродѣтели процвѣтши, и покрываетъ концы.

Видѣвши преславная вся земля странная же и дивныя вещи, како Дѣва, отъ ангела пищу приѣмлющи, образы строенія носить.

Храмъ, и палата, и небо одушевленное явльшися, Богоневѣсто Царева, во храмъ законный приводима днесь, Тому соблюдаема, Пречистая.

Инь.

Ирмосъ: *Ты моя крѣпость, Господи, Ты моя и сила, Ты мой Богъ, Ты мое радованіе, не оставль нѣдра Отча, и нашу нищету поспѣивъ. Тѣмъ съ пророкомъ Аввакумомъ зову Ти: слава Твоей слава, Человѣколюбче.*

Страдальческое, Екатерино, противление показала еси, мученице приснопамятная, враждебнику зло терпеливо противляющаяся и того поправши ногами красными Креста силою, страстоносице, мучениковъ похвала.

Невѣста Христова, Екатерино всеблаженная, явилася еси, Божественныя красоты свѣтовидными лучами просвѣщаема и добротою сияючи. Тѣмже и, веселящися, пѣснопоѣши Владыцѣ: силѣ Твоей слава, Человѣколюбче.

Мучительскую гордыню низложила еси и Божественнымъ словомъ мудрости твоея яко отъ глубины лѣстнаго демоноговѣнія прельщаемыя исхитила еси, учащи звати Христу пѣснопоющія: силѣ Твоей слава, Человѣколюбче.

Благославное и свѣтоносное торжество славныя памяти твоея, всехвальная, крѣпко дерзость вражю поправши, яко солнце, возсия, въ немже велегласно Владыцѣ вопіемъ: силѣ Твоей слава, Человѣколюбче.

Богородичень: Нынѣ крѣпость низложи отметающихся образа, Отроковице, поклоненія Тебѣ, Чистыя, и паче ума изъ Тебѣ воплощеннаго и мѣръ весь просвѣщаго, и всѣхъ святыхъ, вѣрою же чтущія Тя просвѣти, еди́на Всепѣтая.

Катавасія: Жезль изъ корене Иессеева и цвѣтъ отъ него, Христѣ, отъ Дѣвы прозяблъ

еси́, изъ горы́, Хва́льный, приосънѣнныя ча́щи
прише́лъ еси́, вопло́щся отъ Неискусому́жн्या,
Невещѣственныи и Бо́же, сла́ва си́ль Твое́й,
Го́споди.

Пѣснь 5.

Ирмо́сь: Ужасо́шася вся́ческая въ честнѣмъ
вхожде́нии Твое́мъ: Ты бо, Неискусобра́чная Дѣ́во,
вну́тръ вошла́ еси́ въ хра́мъ Бо́жій, я́коже
честнѣ́йшій хра́мъ, всѣ́мъ воспѣ́вающимъ Тя
ми́ръ подава́ющая.

Свяще́ние сла́вное и свяще́нное возложе́ние,
днесъ Пречи́стая Дѣ́ва, возложивши́ся въ хра́мъ
Бо́жій, Всецарю́ нашему́ Бо́гу Еди́ному въ
жилище́ соблюда́ется, я́ко вѣ́сть Са́мъ.

Добро́ту, Пречи́стая, души́ Твоея́ зря́ нѣкогда,
вѣро́ю Заха́рїа возопи́: Ты́ еси́ избавле́ние, Ты́ еси́
всѣ́хъ ра́дость, Ты́ еси́ воззва́ние на́ше, Ею́же
Невмѣ́стныи вмѣ́щенъ мнѣ́ яви́тся.

О, па́че ума́ чудесъ́ Твои́хъ, Всечи́стая!
Стра́нное Твое́ рождество́ е́сть, стра́ненъ о́бразъ
возраще́ния Твоего́, стра́нна и пресла́вна Твоя́,
Богоневѣ́сто, вся́ и челове́ки несказанна.

Свѣ́щникъ́ многосвѣ́тлый́ су́щи, Богоневѣ́сто,
днесъ́ возсія́ла еси́ въ до́мъ Го́сподни и озаря́еши
ны́ честны́ми дарова́нии, Чи́стая, чудесъ́ Твои́хъ,
Богоро́дице́ всепѣ́тая.

Инь.

Ирмо́сь: *Вскую́ мя́ отрину́ль еси́ отъ лица́ Твоего́, Свѣте незаходи́мый, и покрѣла мя́ е́сть чуждая́ тма́ окая́ннаго? Но обрати́ мя, и къ свѣту́ заповѣдей Твои́хъ пути́ моя́ напра́ви, молю́ся.*

Любо́вию огнепалѣма, мученице́ всесла́вная, Влады́ки твоего́ и и́щущи Того́ недомы́сленную доброту́ видѣти, самовольнымъ нра́вомъ ра́намъ себе́ вдала́ еси́, дѣвства́ сия́ющи благода́тьми.

Страстьми́ священнѣйшими, отрокови́це добродѣ́во, украсивши́ тебе́ самую́ благолѣ́пно, возшла́ еси́ къ небесному́ Христову́ черто́гу и ны́нѣ свѣ́тло твоему́ Жениху́, веселя́щися, сочта́лася еси́, всеблаже́нная.

Отрокови́ца всесвѣ́тлая явила́ся еси́, возлюбивши́ Еди́наго Желáемаго, и, во слѣ́дъ Того́ крѣпчайшее́ теченіе́ совершивши́, въ воню́ мѣра твоего́ умнаго́ истощеннаго́, вопія́ла еси́: теку́, Женише́ мой.

Богородиче́нь: *Истинную́ Богороди́цу Тя́ вси́ позна́вше, Пречы́стая Влады́чице, изъ Тебе́ ро́ждшаго́ся Бо́га Сло́ва вѣ́дяще, проповѣ́даемъ во двѣ́ существа́хъ, хотѣ́ннихъ самовла́стныхъ познава́ема, Ма́ти Богоневѣ́стная.*

Катава́сія: *Бо́гъ Сый́ міра́, Оте́цъ щедро́тъ, вели́каго́ Совѣ́та Твоего́ Ангела́, міръ*

подава́юща, посла́лъ еси́ на́мъ; тѣ́мъ,
богоразу́мія къ свѣ́ту наста́вльшеса, отъ но́щи
у́треннююще, славосло́вимъ Тя́, Человѣ́кколѹ́бче.

Пѣ́снь 6.

Ирмо́сь: **Б**ожѣ́ственное сіе́ и всечестно́е
соверша́юще пра́зднество, богому́дри,
Богома́тере, прииді́те, рука́ми воспле́щимъ,
отъ Нея́ ро́ждшагося Бо́га сла́вимъ.

Вся́ческая Нося́й глаго́ломъ, моли́тву
пра́ведныхъ услы́ша. Тѣ́мже непло́дныя
разрѣ́шилъ еси́ недѹ́гъ, я́ко Благоутро́бенъ,
ра́дости Винов́ную симъ дарова́.

Сказа́ти хотя́ Госпо́дь язы́комъ Своѣ́ спасѣ́ніе,
Неискусобра́чную ны́нѣ отъ чело́вѣкъ прія́тъ,
прими́ренія зна́меніе и обновле́ніа.

Яко до́мъ су́щи благода́ти, въ нѣ́мже
сокро́вища лежа́тъ неизрече́ннаго Бо́жіа
строѣ́ніа, Всечы́стая, въ хра́мъ причасты́лася еси́
нетлѣ́нныа сла́дости.

Диади́му Тя ца́рскую приѣ́мъ, хра́мъ,
Богоневѣ́сто, просвѣ́щашеса и подступа́ше
лу́чшимъ, предрече́нныхъ зря́ на Тебѣ́ сбытіе́.

Инѣ́.

Ирмо́сь: **Б**ѣ́дна грѣ́ховъ и прегрѣ́шеній бу́ря
мя́ смуща́етъ и во глубину́ ну́жнаго рѣ́етъ мя́

отча́янія, но Твою́ крѣ́пкую ру́ку мнѣ́ простри́,
яко́ Петро́ви, о Управителю́! и спаси́.

Всю́ тя, добро́тою сия́юще, дѣ́вства заре́ю,
му́ченическими же, отрокови́це, обагрѣ́ну
кровьми́, видѣ́въ, благо́е Сло́во и пречисто́е въ
черто́зѣхъ небѣ́сныхъ тя всели́.

Возмогла́ еси́ Кресто́мъ мучи́телей разруши́ти
держа́ву, и ми́рскія му́дрости обличивши́ суету́,
богодохнове́ннаго уче́нія точа́щи догма́ты,
велему́дренная́ Екатери́но приснопа́мятная.

Лѣ́стію пѣ́рвѣ́ Ада́ма райскія́ сла́дости
изгна́вшаго, ра́нь болѣ́зни крѣ́пко терпя́щи,
низложи́ла еси́ на зе́млю, му́ченице́ всесла́вная,
и вѣ́нцы Ца́рствія́ вѣ́нчалася́ еси́.

Богоро́диченъ: Ми́лостива мнѣ́ Судію́ и Сы́на
Твоего́, Богоро́дице́ Дѣ́во, Твоими́ мо́льба́ми
бы́ти въ де́нь суда́, Изба́вителя́ же лю́тыхъ,
Ма́ти, сотвори́, къ Тебѣ́ бо еди́ной наде́жды
возлага́ю.

Катава́сія: *Изъ* утробы́ Іо́ну младе́нца
избле́ва морскі́й звѣ́рь, якова́ пріа́тъ; въ Дѣ́ву же
всѣ́льшее́ Сло́во и плоть пріе́мшее́ пройде́,
сохра́ншее́ нетлѣ́нну: Его́же, бо не пострада́
истлѣ́нія, Ро́ждшую́ сохрани́ невре́жденну́.

Кондакъ свѣтъя, гласъ 2. Подобень:

Вышнихъ ища.

Ликъ честный божественнѣ, мучениколѹбцы, воздвигните нынѣ, почитающе всемѹдрую Екатерину, сѣ бо въ тризници Христа проповѣда и змѣя попрѣ, рѣторовъ разумы укротивши.

Икосъ:

Отъ Бога мѹдрость прѣимши издѣтства, мѹченице, и внѣшнюю добрѣ мѹдрость всю извѣче, познавши убо отъ тоя стихій движеніе же и твореніе по слову, и сѣ изъ начала словомъ Сотворшаго, Тому благодареніе въ ноци и во дни приношаше, идолы низложивши и симъ несмысленно служащія рѣторовъ разумы укротивши.

Пѣснь 7.

Ирмосъ: *Не послужиша твари богомѹдри, паче Создавшаго, но, огненное прещеніе мужески поправше, радовахуся, поюще: препѣтый отецъвъ Господь и Богъ, благословенъ еси.*

Сѣ днѣсь возсѣя концѣмъ весна радостная, просвѣщаючи нашу дѹшу, и помышленіе и умъ благодатю, торжествомъ Богородицы днѣсь таинственно да учредимся.

Да дароно́сятъ днесъ вся́ческая Цари́цѣ, Матери́ Божіи, не́бо и земля, и а́нгеловъ чини, и чело́вѣковъ мно́жество и да вопію́тъ: во хра́мъ вво́дится Ра́дость и Избавле́ніе.

Писа́ніе мимоте́чѣ и оскудѣ́ зако́нъ, я́коже сѣ́нь, и благода́ти лучи́ возсія́ша въ хра́мъ Божі́й вше́дшей Тебѣ́, Дѣ́во Ма́ти Чі́стая, въ не́мъ благослове́нная.

Повину́ся Рожде́ству́ Твоему́, Всечі́стая, я́ко Творцу́ и Бо́гу не́бо, и земля, и преиспо́дня, и вся́къ язы́къ земныхъ исповѣ́даетъ, я́ко Госпо́дь яви́ся, Спа́съ ду́шъ нашихъ.

Инъ.

Ирмо́сь: *Божія́ снизхожде́нія о́гнь устыдѣ́ся въ Вавило́нъ ино́гда. Сего́ ра́ди о́троцы въ пе́щи, ра́дованною ного́ю, я́ко во цвѣ́тницѣ́, лику́юще, поя́ху: благослове́нъ еси́, Бо́же оте́цъ нашихъ.*

Мучениковъ хвала́, благоче́стія учи́тельница была́ еси́, свѣ́тлomú твоему́ Жениху́ мучениковъ мно́жество приве́дши, Христу́. Съ ними́же зове́ши, всехва́льная, пою́щи: благослове́нъ Бо́гъ оте́цъ нашихъ.

Сло́во твое́ премудро́е ко спасе́нію мно́ги исхити́ отъ идолонеи́стовства и свѣ́тоно́сны яви́ мученики, велегласно́ съ тобо́ю взыва́ющія: благослове́нъ Бо́гъ оте́цъ нашихъ.

Отроковица, въ слѣдъ Тебѣ идущи, Тебѣ приведѣся, мечемъ посѣчена, Твою подражающею страсть пречистую и Тебѣ, Зиждителю, вопиюще и глаголюще: благословенъ Богъ отецъ нашихъ.

Богородиченъ: Святыхъ Святый, въ Тебѣ свято вселився, Чистая Богородице Дѣво, воплощенъ, изъ Тебѣ раждается, за еже спасти вѣрою зовущія: благословенъ Богъ отецъ нашихъ.

Катавасія: Отроцы, *благочестію совоспитани, злочестиваго вельнія небрегше, огненнаго прещенія не убояшася, но, посреди пламене стояще, пояху: отцевъ Боже, благословенъ еси.*

Пѣснь 8.

Ирмосъ: *Слыши, Отроковице, Дѣво Чистая, да речетъ убо Гавриилъ советъ Вышняго, древній, истинный: буди къ пріятію готова Божію, Тобою бо Невмѣстимый съ человеки поживе. Тѣмъ и радуяся, вопію: благословите, вся дѣла Господня, Господа.*

Пречистый храмъ въ домъ Божій приводящи Анна иногда, вопиюще, съ вѣрою рече священнику: чадо, отъ Бога данное мнѣ, приимъ нынѣ, введи во храмъ Зиждителя твоего и, радуяся, пой Ему: благословите, вся дѣла Господня, Господа.

Рече́, ви́дѣвъ, Аннѣ́ ино́гда́ Ду́хомъ Заха́рія: Жи́зни Ма́терь вво́диши и́стинную, Ю́же свѣ́тло проро́цы Бо́жии Богоро́дицу проповѣ́даша, и ка́ко хра́мъ вмѣ́ститъ Ю? Тѣ́мъ чу́дяся, вопію́: **благослови́те,** вся́ дѣ́ла́ Госпо́дня, Го́спода.

Раба́ Бо́жія бы́хъ а́зь, — отвѣ́ща́ Анна е́му, — призыва́ющи Сего́ вѣ́рою и моли́твою, прі́яти моея́ болѣ́зни пло́дъ, по прі́яти же ро́ждѣнну́ю привести́ Да́вшему Ю. Тѣ́мъ, зовя́, вопію́: **благослови́те,** вся́ дѣ́ла́ Госпо́дня Го́спода.

Зако́нное вои́стинну дѣ́ло е́сть, — свяще́нникъ рече́ е́й, — стра́нну же ве́сьма́ ве́щь пора́зумѣ́ваю, зря́ Приводи́мую въ до́мъ Бо́жій, пресла́вно превосхо́дящую свята́я благода́тію. Тѣ́мъ и ра́дуяся, вопію́: **благослови́те,** вся́ дѣ́ла́ Госпо́дня, Го́спода.

Инѣ́.

Ирмо́сь: *Седмери́цею пе́щь халде́йскій мучи́тель богочести́вымъ неистовно разжже́, си́лю же лу́чшею спасе́ны сія́ ви́дѣвъ, Твори́цу и Изба́вителю вопія́ше: о́троцы, благослови́те, свяще́нницы, воспойте́, лю́діе, превозноси́те во вся́ вѣ́ки.*

Твои́ми уче́нии ца́рица, вѣ́рующи, прите́че ко благоче́стію, и крѣ́пко претерпѣ́вши болѣ́зней чу́вство, и Ца́рствія́ небесна́го непре́емнаго я́вственнó сподо́бися, вопію́щи Влады́цѣ:

священницы, благословите, людіе, превозносите во вся вѣки.

Сь мученики да будутъ вѣрныхъ прошенія, страстотерпица бо Христу предстоитъ, просящи лучшая и спасенія ходатайственная всесвятую и честную ея память усердно совершающимъ и вѣрно пѣснопоющимъ: людіе, превозносите Христа во вѣки.

Отвѣрзъ, приѣмлетъ тя Женихъ, всемудрая, двѣри райскія, и въ чертозѣ всесвѣтлѣмъ обитати сотвори, Царствія причастницу яко сообщницу страстей являетъ. Емуже нынѣ предстоящи, царева дщи, свѣтло украшена, насъ не забуди.

Ухищренными глаголы искушааше мучитель, и увѣтливословіи, лютой, лстыя, ослабити твою крѣпость надѣявся, славная, но уневѣститися Христу хотящи, вопіяла еси Владыцѣ: священницы, воспойте, людіе, превозносите Христа во вѣки.

Богородичень: Священнѣйши была еси, Богородице Всенепорочная, премірнаго ангеловъ чина: сихъ бо родила еси Содѣтеля и Господа отъ дѣвственныхя и неискусобрачныя утробы, во двѣхъ существахъ неслиянно и невращно, во единой же впостаси Бога воплощенна.

Катавасія: Чюда *преестественнаго*
росодательная изобрази пещь образъ: не бо, яже

пріятъ, палитъ юныя, яко ниже огонь
Божества — Дѣвы, въ Нюже вниде утробу.
Тѣмъ, воспѣвающе, воспоемъ: да благословитъ
тварь вся Господа и превозноситъ во вся вѣки.

Пѣснь 9.

Ирмосъ: Яко одушевленному Божію кивоту,
да никакоже коснется рука скверныхъ, устнѣ
же вѣрныхъ Богородицѣ немолчно, гласъ ангела
воспѣвающе, съ радостію да вопіють: истинно
вышши всѣхъ еси, Дѣво Чистая.

Яко пресвѣтлую, Богородице Чистая,
душевныя чистоты имущи доброту, благодатию
же Божіею исполняема съ небесе, Свѣтомъ
Присносущнымъ просвѣщаеши всегда съ
веселіемъ вопіющія: истинно вышши всѣхъ еси,
Дѣво Чистая.

Прелетаетъ, Богородице, Чистая, чудо Твое
силу словесъ: тѣло бо въ Тебѣ поразумѣваю паче
слова, теченія грѣховнаго неприятно. Тѣмже
благодарственнно вопію Ти: истинно вышши
всѣхъ еси, Дѣво Чистая.

Преславно прообразоваше, Чистая, законъ Тя
скинію и Божественную стамну, странень
кивотъ, и катапетасму, и жезлъ, храмъ
неразрушимый и двѣрь Божію. Тѣмже научаютъ
Тебѣ звати: истинно вышши всѣхъ еси, Дѣво
Чистая.

Пѣснопо́я Тебѣ́, провозглаша́ше Дави́дъ, глаго́ля Тя́ Дщѣ́рь Царе́ву, красо́тою добродѣ́телей, одесну́ю предстоя́щую Бо́га, ви́дѣвъ Тя́ упещре́ну. Тѣ́мже, проро́чествуя, вопія́ше: и́стинно вы́шши всѣ́хъ еси́, Дѣ́во Чи́стая.

Инь.

Ирмо́сь: Ужасе́ся о се́мъ не́бо, и земли́ удиви́шася концы́, я́ко Бо́гъ яви́ся челове́комъ плоти́ски и чре́во Твое́ бы́сть пространнѣ́йшее небесе́ъ. Тѣ́мъ Тя́, Богоро́дицу, а́нгеловъ и челове́къ чинонача́лія велича́ютъ.

Преста́вилася еси́ къ черто́гомъ свѣ́товиднымъ, невѣ́стными укра́шена у́тварьми, дѣ́вственную иму́щи свѣ́щу въ тво́ей десни́цѣ, въ друго́й же держа́щи отсѣ́ченную твою́ главу́. И ны́нѣ, предстоя́щи Христу́, тво́ему Жениху́, Тя́ пою́щія сохрани́.

Пря́та бы́сть тво́я, богому́драя, моли́тва, вѣ́рою бо тво́е имену́ющія́ имя, честна́я, спаса́етъ Влады́ка отъ искуше́ній и благоздравіе́ подае́тъ, неду́говъ изба́вляя всеразлі́чныхъ, душе́вныхъ же и тѣ́лесныхъ. Тѣ́мъ тя́, весе́лящеся, Екате́рино, ублажа́емъ.

Приста́ла еси́ тихому́ приста́нищу ны́нѣ, благоопря́тно же и легко́ мо́ре ми́рское, му́ченице, преплы́вши трево́лнѣній, не

искусившия, всемудрая, богатство
многообразное Христу приносящи, дѣво,
множество мученикъ, Екатерино всеблаженная.

Въ чертозѣхъ небесныхъ нынѣ внутрь съ
дѣвственныхъ лики ликовствующи,
мученическими озаряема лучами, Екатерино
всемудрая, разрѣши паденій моихъ пленицы,
усердно молящи всѣхъ Благодѣтеля, за Егѡже
кровь твою изліяла еси.

Богородичень: Явилася еси, о Дѣво Мати
Божія! паче естества рѡждши въ тѣлеси благое
Слово, Егѡже отъ сердца Своего Отець отрыгне
прежде всѣхъ вѣковъ, яко благо, Егѡже нынѣ и
тѣлесъ превышша разумѣваемъ, аще и въ тѣло
облечеса.

Катавасія: Таинство странное вижу и
преславное: небо — вертепъ; престолъ
херувимскій — Дѣву; ясли — вмѣстѣлице, въ
нихже возлеже Невмѣстимый — Христось Богъ,
Егѡже, воспѣвающе, величаемъ.

Свѣтиленъ святѣя. Подобень: Духомъ во
святилици.

Возжиляема мудрованіемъ жень, о дѣво
Екатерино всечестная, страстотѣрпцевъ славо,
философовъ хитрость о Бозѣ обличила еси,
яко буесловіе сущу и баснь, всенепорочную

и́стинно Ма́терь Бо́жію спо́мощницу
стяжа́вши. **[Два́жды.]**

Сла́ва, и ны́нѣ, пра́здника.

Подобѣнь: Ученико́мъ зря́щимъ.

Ангельсти́и чѣни и му́ченической ли́къ
пра́зднуеть днѣсь съ на́ми въ боже́ственнѣмъ
введе́ніи Богоотрокови́цы и Ма́тере Господни
отъ Иоакима́ же и Анны, вкупѣ́ твёрдаго
Мерку́рія и пресла́вныя Екате́рины. Ихже
моли́твами обрѣ́сти на́мъ оставле́ніе мно́гихъ
согрѣше́ній, молимся.

**На хвали́техъ стихи́ры на 6: пра́здника 3 и
святы́я 3:**

Стихи́ры пра́здника, гла́сь 2.

Подобѣнь: До́ме Евфра́товъ.

Свѣ́тъ Тя́ трисі́янный* вжѣ́гши,
Богоро́дице,* въ хра́мъ сла́вы* небѣ́сную Ти́
пи́щу посыла́еть,* велича́я Тя́.

Изь ко́рене у́бо Дави́дова* прозябла́ еси́,
Дѣ́во,* Гаври́иль, Тебѣ́ ра́дость
прино́ся,* вопія́ше:* Бо́га роди́ши, Пречі́стая.

Бла́го же свяще́нному* и боже́ственному
сопряже́нію* Иоакима́ и Анны,* изъ ни́хже
Чи́стая роди́ся,* приведе́на бы́сть ны́нѣ Творцу́
Своему́.

Стихи́ры святы́я, гласъ 4. **Подобеньъ: Дáль еси́ зна́меніе.**

Па́мять всесвященную,* Екатери́но
всехва́льная,* че́стнаго твоего́ страда́нія
соверша́юще,* сла́вимъ во гласѣхъ
непреста́нныхъ* дарова́вшаго терпѣ́ніе тебѣ́
твѣ́рдое,* и побѣдоно́сну тя́ показа́вшаго,* и
сло́во тебѣ́ пода́вшаго, устраша́ющаго
ри́торы,* Иису́са Человѣ́колю́бца,* и Спа́са, и
Го́спода.

Му́ченице самово́льная,* Екатери́но
всесла́вная, явила́ся еси́,* мучи́теля благомо́щно
обличивши* и лю́тое неисто́вство
многобо́жія* богозна́нія сія́ніемъ низлага́ющи* и
Боже́ственною благода́тію.* Отону́дуже, и я́ко
му́ченицу,* и я́ко дѣ́ву непоро́чну, Христо́сь
вѣ́нча,* Спа́сь ду́шъ на́шихъ.

Благода́ть Ду́ха,* Екатери́но
всесла́вная,* отверже́ніемъ у́сть при́яла
еси́,* очисти́вши тебѣ́ са́мую житі́емъ,* и
по́мысломъ терпѣ́ливымъ* мучи́телей го́рдость
попра́ла еси́,* и добро́тою тѣ́лесною* душе́вную
красоту́ богому́дреннѣ́ предпочла́
еси́,* страда́льцевъ удо́брѣніе.

Сла́ва, гласъ 2. Вави́лы мона́ха:

Житі́е невеще́ственно навѣ́кши, суди́ще
безбо́жное дости́гши, ста́ла еси́, побѣдоно́сице,

Екатери́но честна́я, цвѣтоно́сящи Бо́жію свѣтло́сть и Божѣ́ственною мо́щію одѣ́яна, повелѣ́нію мучи́телеву поруга́лася еси́ и рито́ровъ утоли́ла еси́ буесло́вныя рѣчи, многострада́льная.

И ны́нѣ, гла́сь 6. Се́ргія Агіопо́лита:

Дне́сь собо́ри вѣрны́хъ, соше́дшеся, духо́внѣ да торжеству́имъ и Богоотрокови́цу Дѣ́ву и Богоро́дицу, въ хра́мъ Госпо́день приводи́му, благоче́стно восхва́лимъ, предъизбра́нну отъ всѣ́хъ родо́въ, во оби́телище всѣ́хъ Царя́ Христа́ и Бо́га: дѣ́вы, свѣ́щи нося́ще, предъиди́те, Приснодѣ́вы чту́ще честное́ происхожде́ніе, ма́тери, печа́ль всю́ отложивше́, ра́достно спослѣ́дствуйте Ма́тери Бо́га быва́ющей и ра́дости ми́ра Ходатаи́цъ. Все́и убо ра́достно, е́же — раду́йся, — со а́нгеломъ возопи́мъ Обра́дованнѣ́й, прісно моля́щейся о душа́хъ на́шихъ.

**Славосло́віе вели́кое. По трисвято́мъ:
Тропа́рь святы́я. Сла́ва, и ны́нѣ,
пра́здника. [Пи́саны на ма́лѣй
вече́рни.] Ектени́ и отпу́сть.
На часѣ́хъ: Тропа́рь пра́здника, Сла́ва,
святы́я. Кондаки пра́здника и святы́я
премѣня́юще глаго́лемъ.**

НА ЛИТУРГИИ,

Блаженна праздника, пѣснь 7-я и 8-я, на 4 и святыя, пѣснь 6-я, [на 4]. По входѣ: Тропарь праздника и святыя. Слава, кондакъ святыя. И нынѣ, праздника. Прокимень праздника, гласъ 3. Пѣснь Богородицы: Величитъ душа Моя Господа, [и возрадовася духъ Мой о Бозѣ Спасѣ Моємъ]. **Стихъ:** Яко призрѣ на смиреніе рабы Своея, [сѣ бо, отнынѣ ублажатъ Мя вси роди]. **И святыя, гласъ 4:** Дивенъ Богъ во святыхъ Своихъ, Богъ Израилевъ. **Апостоль святыя, ко Ефесеемъ, зачало 233:** Братіе, возмогайте о Господѣ... [**Аллилуія праздника, гласъ 8:** Слыши, Дщи, и виждь, и приклони ухо Твое. **Стихъ:** Лицу Твоему помолятся богатіи людстіи. **И святыя,] гласъ 4:** Возваша праведни и Господъ услыша ихъ, [и отъ всѣхъ скорбей ихъ избави ихъ]. **Евангеліе святыя, отъ Луки, зачало 106:** Рече Господъ Своимъ ученикомъ: внемлите отъ человѣкъ... **Причастенъ праздника:** **Причастенъ:** Чашу спасенія приму, и имя Господне призову. **И святыя:** Радуйтеся праведни о Господѣ, правымъ подобаетъ похвала.

**Подобаетъ вѣдати, аще случится
попразднство Входа Богородицы и**

**празднество святыя великомученицы
Екатерины въ недѣлю:**

Въ субботу вечера, на малѣй вечерни: Стихиры воскресны 4. Слава, святыя. И нынѣ, праздника. На стиховнѣ стихира воскресна едина, таже стиховна съ припѣвы своими и Слава, святыя. И нынѣ, праздника. По трисвятомъ: Тропарь воскресенъ. Слава, святыя. И нынѣ, праздника. И отпустъ.

На велицѣй вечерни. На Господи возвахъ: Стихиры воскресны 3, и праздника 3 и святыя 4. Слава, святыя. И нынѣ, богородиченъ 1-й гласа. Входъ. Прокименъ дне и чтенія святѣй 3. На литіи: Стихира праздника и святыя [стихиры]. Слава, святыя. И нынѣ, праздника. На стиховнѣ: Стихиры воскресны. Слава, святыя. И нынѣ, праздника. На благословеніи хлѣбовъ: Тропарь праздника, дважды. И святѣй, единожды.

На утрени. На Богъ Господь: Тропарь воскресенъ, дважды. Слава, святыя. И нынѣ, праздника. По каѳисмахъ: Съдальны воскресны съ богородичны ихъ. И чтеніе во Евангеліи Толковомъ. Полиелей и тропари Ангельскій соборъ... Ипакой гласа. И съдальны святыя вси, по единожды. Слава, съдаленъ

иже по поліеліи. И нынѣ, прѣздника. Таже степенна и прокимень, гласа. Евангеліе воскресно и стихира воскресна. Канонъ воскресень, со ирмосомъ на 4, и прѣздника на 4 и святыя на 6. Катавасія: Христосъ раждається... По 3-й пѣсни: Кондакъ прѣздника и икосъ. И святыя [кондакъ и икосъ]. И сѣдалень святыя, [дважды]. Слава, и нынѣ, прѣздника. По 6-й пѣсни: Кондакъ и икосъ воскресень. И чтѣмъ прологъ. На 9-й пѣсни поемъ Честнѣйшую... Свѣтиленъ воскресень. Слава, святыя. И нынѣ, прѣздника. На хвалитехъ: Стихиры воскресны 4. И святыя, со славнымъ 4, съ припѣвы ея. [Стихъ 1-й: Дивенъ Богъ во святыихъ Своихъ, Богъ Израилевъ. Стихъ 2-й: Въ церквахъ благословите Бога, Господа отъ источникъ Израилевыхъ.] Слава, стихира евангельская. И нынѣ, Прѣблагословенна еси, Богородице Дѣво... Славословіе великое. По трисвятомъ тропарь воскресень точию. И ектеніи и отпустъ.

На часѣхъ. Тропарь воскресень прѣжде. Слава, прѣздника и святыя премѣняемъ. Кондакъ прѣздника, и воскресень и святыя премѣняемъ же.

На литургии. Блаженна гласа на 4, и прѣздника, пѣснь рядовая, на 4, и святыя,

пѣснь 6-я на 4. По входѣ тропарі и кондаки воскресны, и праздника, и храма и святыя. Прокименъ гласа и святыя. Апостоль, и Евангеліе и причастенъ, дне и святыя.

Источникъ: Служба святѣй великомученицѣ Екатеринѣ, отправляемая по церковному чиноположенію со всенощнымъ бдѣніемъ, въ Высокоторжественный день Тезоименитства Ея Императорскаго Величества, Благочестивѣйшія Государыни Императрицы Екатерины Алексіевны, Самодержицы Всероссійскія, Ноёмврія 24-го. — М.: Въ Московской Тѣпографіи, 1765. — 27 л.

